

Ti xroon chr'éhen Pablo ti sin

Filipenses

Nixjehe Pablo ti sin ninko Filipenses

1 ¹*Janhan Pablo la ko Timoteo, ch'ehe ni ixra Ìnchéni Jesucristo, mé ikjini ti xroon i chr'ahánra kaínra kíchóni tinkachónkira Cristo Jesús; jahara tjejora chjasin Filipos, la ko ti sin t'etōan ninko la ko ti sin tjinkĩtsa kuènté ninko méhe. ²Kjuasáye It'eni Díos la ko Ìnchéni Jesucristo imá sintañaora la ko chrók'uayéhéra ti kjuaxróxin kuènté Díos.

Pablo chrónoéhe Díos kixin ti sin tinkáchónki Jesús

³Ti ó xráxinkāoan ti jahara la tjahā Díos kjuasáya ⁴la ko ti ó nixjahā Díos la imá chéhe asená tjáncháhā ch'an kixin tsjinkĩtsa ch'an ti jahara, ⁵kixin nkokōa kuék'ejóni k'uékjich'eni ti ixra kuènté Ìnchéni ndesi ti ñao saoxín kuihínra ti itén Díos, la ko naxā tjejoch'era ti ixra ijie. ⁶Janhan la ó nona kixin Díos ó kjuankíxin sich'e ijnko

ixra jína nkaya asánra kixin kuitekāonra Ìnchéni, la xíkaha naxā tsjintaxín sich'e ch'an ti ixra hasta tsjixraká ti ñao tsokjan Ìnchéni Jesucristo. ⁷Mé xíkaha jína it'a, tjénkayáxian ti jahara, kixin imá tjuhára. Jahara la ko janhan la nkokón k'uáyéhēni ti kjuachaxin kuènté Ìnchéni, la kjónté tjéchjina o chrókjuak'é ti tjejó ti sin t'etōan, la xrjanká kixin jína ti itan chaxín tsaáxini. ⁸Díos la ó nohe kixin imá tjuhára éxi tjuexin Cristo ti jahara. ⁹Tjáncháha Díos kixin tsjinkĩtsa ti jahara kixin antsí chrótjuéhéra ch'an, la ko antsí chrók'uánkí ti kjuaxrexinkaon kuèntára kixin jína chrókjuenkayáxinra ¹⁰kixin chrókónohara nkexrín tsjéyára ti nkehe antsí jína. Mé xíkaha tsokohya nkexro tsjanchia ijie ti ó tsokjan Ìnchéni Jesucristo. ¹¹Méxra jahara chrókjuich'era ti ixra jína kixin kjuasáye Jesucristo tjinkĩtsa ch'an ti jahara, la xíkaha kaín chojni tsjikosáyehe sin Díos.

Janhan tjékian Cristo

¹² Kíchóni, tjínkaon kixin tsonohara kaín ti nkehe k'uátsínkaxián janhan la chaxín kjuínkítsa kixin kuíhin chojni ti itan nixin tjajon kjuachón.

¹³ *Mé xíkaha kaín ti soldado síin palacio la ko kaín ti iso sin mé nohe sin kixin tjéchiina kixin tinkachónkia Jesucristo. ¹⁴ La ti tjéchiina, la itsjé ti sin kíchóni antsí tóxríhin sin tsochronka sin ti itén Díos, la í chrakonhña sin tinkáchónki sin Ìnchéni.

¹⁵ Chaxín iso sin la tjako sin itén Cristo kixin tjinkaon sin chrókjuachaxin sin kixin tóchjinoxíhin sin kixin ti ixra kjuajon Díos. Kjánchó iso sin la chaxín kaín asén sin tjako sin itén Díos. ¹⁶ Nkojín sin la nixja sin itén Cristo kixin nchenkexín sin ó, la jehya chaxín kaín asén sin. Mé xíkaha nixja sin kixin tjinkaon sin kixin antsí chrókjuasóteni ti tjechjinani. ¹⁷ Andá iso sin la chrónka sin itén Díos kixin tjuana sin, la ó nohe sin kixin Díos mé kjuajon kjuachaxin tsjak'é ntihi kixin tsjákoxian kixin chaxín ti itén Díos mé tsaáxini. ¹⁸ Kjánchó janhan la tónínkakhonhña, kjónté á chaxín kaín asén sin tjako sin o náhi, janhan la tóchéhe asená kixin chrónka sin ti itan jína kuèté Cristo.

¹⁹ Méxra janhan la ó nona kixin kaín tíhi la jína ts'axrje kixin

kjuasáyara tjejonixjehéra Díos, la ko ti Nchakuén Jesucristo mé tjínkítsa. ²⁰ Kixin ti nkehe tjínkaon la chrókósuànahña chrónixja, kixin ijie la ko nkochrín chrókjuákoxian ti kjuachaxin ijie kuèté Cristo, ti naxa tjétsjaha o ti ó tsík'en janhan. ²¹ Kixin ti naxa tjétsjaha, la janhan Cristo t'aha ixra, andá ti ó its'éni la ó kjuixin kjuácha ti nkehe antsí jína. ²² Méxra ti naxa tsjak'étsjaha ntihi chjasintajni la naxa antsí sit'aha ixra Ìnchéni la nonahña nkexéhe ti antsí jína. ²³ Imá ixra tsonona nkehe ti antsí jína kixin ti chrók'uen janhan la chrókjuak'ekian Cristo. Mé tjénkayáxian kixin ícha jína tíha. ²⁴ Kjánchó kjaxin nona kixin antsí tjeoan naxa chrókjuak'etsjaha kixin naxa chrókjuinkítsa ti jahara. ²⁵ Méxra ó nona kixin kjá naxa tsjak'é iso ñao ntihi chjasintajni kixin tsjínkítsa ti jahara, kixin antsí chrókónohara la ko chrókócháhara kixin chaxín jína chrókuitekáonra Ìnchéni. ²⁶ La ijnko ti ñao i ó tsjasán janhan tsonixjahára inaá, ndá antsí tsocháhara la ko tsochjehéra kjuasáya Jesucristo.

²⁷ Antsí tjeoan kixin jahara chrókjuákoxinra jína la ko chrók'uejora éxi ndáchro ti itan kjuákoxin Ìnchéni Cristo. Mé xíkaha ti ó chrókjuasántsajahára o náhi,

la kjónté ikjín itjén, tjínkəoan chrókuihan kixin jahara naxa jína tinkachónkira Cristo la ko nkokəa tjénkayáxinra la ko nkokəa tjejoch'era ti ixra, tjákoxinra ti itan jína tsaáxin chojni. ²⁸Titōéhyara kixin chrókjuíntachrakonra ti sin nínkakohanra. Ti xikaha chrakonhñara, ndá tsjákoxian kixin jehe sin la ts'itjána sin, andá jahara mé tsochontara kjuachón nkochríxín kixin Díos mé tsjajon tíha. ²⁹Ti ó tinkachónkira Cristo la jehya jehí titekáonra. Náhí. Kjaxin ticháxin tsjasótiaxinra kixin tinkachónkira ch'an. ³⁰*Jahara la ko janhan la nkokón tinkáchónkini kjónté kjuaxróxinhña tjejóni. Jahara ó k'uíkonra senó nkexrín kjuasótena la ijie la ó kuihínra kixin naxa nínkakona sin.

Cristo k'óna chojni, ndá ijie t'etəoan ch'an

2 ¹Mé xikaha, ti nohara kixin Cristo mé nhexraxinkaonra, la ti chéhe asánra kixin tjuahára ch'an, la ti t'ejokəara ti Nchakuén ch'an la ko ti tónohara kixin tikonóahara ch'an ²la ijie la nchechéhéra ti janhan kixin nkokəa chrókjuénkayáxinkoára kichuara, la chrótjuehéra kichuara, la nkokəa chrókjuénkayáxinra

chrókjuich'era ixra ³la ninkehó chróchontiaxinhñara la ko chrókjuínchejiéhyara asánra kixin imá chrókuétəoanra. Chrok'ónara ijnko chojni kanhñó t'etəoan. Nkokón chrókjuíkosáyehéra kichuara éxi antsí tjetəoan ti iso sin ke jahara. ⁴Ninkexró chrókjueyáhya ti nkehe jína kixin jína chrókjuák'e jehó. Náhí. Kjaxin chrókjuinkítsa ti iso sin.

⁵Jahara chrókjuénkayáxinra éxi kjuénkayáxin Cristo Jesús. ⁶Cristo la chóna kaín kjuachaxin kuènté Díos, la kjónté xikaha, la tjinkakonhña ch'an kóyóhe ch'an éxi Díos. ⁷La kuítəhe ch'an nkaya nkajní ti nkehe k'uéchóna ch'an, ndá ntihi chjasintajni kókjéxín ch'an éxi ijnko chojni tjetəanhña xikaha. ⁸La éxi ijnko chojni chóntahya kjuachaxin xikaha kjuák'e ch'an, la kjuínchexitéyá ch'an kaín nkehe k'uetəoan Díos, kjuasótexín ch'an ti ntacruz la ko ik'uén ch'an éxi ijnko chojni chóna nchónhña ijie. ⁹Méxra Díos la imá kjuíkosáyehe ti jehe ch'an la kjuajon ijnko ihnié ch'an antsí tjetəoan ¹⁰*kixin ti tsihin chojni ti ihnié Jesús la kaín sin ts'ejóxin toch'in sin, ti sin tjejó nkaya nkajní la ko ti chojni síin chjasintajni la ko ti sin síin chrínkí inche ¹¹kaín chojni tsondáchro kixin Jesucristo mé Ìnchéni, mé xikaha tsjikosáyehe sin It'éni Díos.

**Éxi xrohi t'inkaséñaxín
chjasintajni**

¹²Mé xikaha jahara kíchóni, xráxín kuitekákonara ti kuék'ejóni nkokoa. Andá ijie la chrókjuinchesiteyára kjónté ikjín itjén. Méxra kaín asánra chrókjuíkosáyehera Díos la ko chrókóxakohanra chrókjuéyára ti nkehe tsjajon kjuachón ¹³kixin Díos la ntaxráxinkaonra la ko tsjínkĩtsara sich'era ti nkehe jína tóxrĩhĩn ch'an.

¹⁴Ti nkojín ixra chrókjuich'era, la chrókónínkakuéñhñara kichuara la ko chrókjóntahyara kichuara ¹⁵*kixin ninkexró chrókjuachahya tsondáchro kixin jahara la chontara ijie, kixin jahara la xjeen Díos la ninkehó ijie chróchontahyara, kjónté tjejoyakjánra ti sin jínahña, tjasin ijie. Jahara la chrók'uinkaséñaxínra ti síin sin éxi ti konotsé t'inkaséñaxín ti chjasintajni sítie. ¹⁶Méxra jahara chrókjuáqoxinra ti itan jína tjajon kjuachón. Ndá xikaha ti ó tsokjan Cristo, la imá tsochéhe asená kixin kjuinchesiteyára, kixin jehya ó chónkó ti ixra kjuít'a. ¹⁷Kjónté ntihi chrók'uenxian la tíha mé éxi ijnko nkehe tsotjahá Díos éxi xikaha jahara chjehéra ch'an ti ixra ich'era kixin tinkachónkira ch'an. Mé kjónté xikaha, la tsochána la tjínkaon kixin

kjaxinra tsocháhara. ¹⁸Méxra chrókócháhara jahara kjaxin, éxi kóchána janhan.

Timoteo la ko Epafrodito

¹⁹Tjínkaon kixin tsjajon Ìnchéni Jesús kjuachaxin kixin tjoka tsochr'an kíchóni Timoteo tsjijitsjehe ti jahara, andá ti ó tsokjan ch'an ndá imá tsochána tsinhan nkexrín tjejora. ²⁰Kixin kohya íjnko nkexro tjenkayáxin éxi ti janhan kixin chrókóxakohen kixin chrók'uejora jína. ²¹Kaín ti íso sin tóxakohen sin xritjeyá sin ti nkehe tjinkaon sin jehó sin, la tjejáhya sin ti nkehe tjinkaon Jesucristo. ²²Méxra jahara la ó nohara kixin kíchóni Timoteo la jína k'uáji la ko jína asén ch'an kixin jehe ch'an la nkokoa kjuít'akian ch'an ixra, kjuínkĩtsa chrónkaxín ch'an ti itan jína. Éxi ijnko xjana xikaha kjuínkĩtsa ch'an ti janhan. ²³Mé xikaha tjínkaon tsochr'an ch'an tsjijitsjehe ch'an ti jahara, kjánchó janhan tsochohan tsonona nkehe tsona, á ts'axrjéxian ntihi o á its'en. ²⁴Méxra janhan la tjéchohan kixin tsjajon Ìnchéni kjuachaxin kixin tjoka tsjasántsajahá ti jahara.

²⁵La kjaxin kjá ticháxin tsétuaghan kíchóni Epafrodito tsokjan ti tjejora. Jehe ch'an mé nkokoa kjuít'akian ch'an ixra,

kjónté kjuaxróxinhña k'uéjoni. Jahara tsíkétuehénra ch'an itsji ch'an ntihi kixin tsjinkĩtsana kaín ti nkehe ticháxin. ²⁶Ndá imá tóxakohen ch'an kixin tsjijitsjehe ch'an kaín ti jahara kixin ó nohe ch'an kixin ó tsíkíhínra kixin k'uéníhi ch'an. ²⁷Andá chaxín k'uéníhi ch'an la chrók'uen ch'an. Kjánchó Díos kuikonoéhe ti jehe ch'an. Kjánchó jehya jehó ch'an. Náhí. Kjaxin janhan kuikonoána Díos kixin kanhño imá chrók'uavá janhan, méxra k'uénhña ch'an. ²⁸Méxra tjínkaosan tjoka tsétuanhan ch'an tsjijitsjehe ch'an ti jahara, kixin ó nona kixin tsöcháhara ts'ikonra ch'an inaá la ko xíkaha, í kanhño chrókóxakòna. ²⁹Imá chrókócháhara ti ó chrókjuji ch'an kixin jehe ch'an mé ijnko kíchóni tinkáchónki Ìnchéni, la ko jahara chrókjuíkosáyehéra ch'an éxi chrókjuíkosáyehéra ti iso sin ch'ehe ixra Ìnchéni éxi jehe ch'an. ³⁰Kixin jehe ch'an kóníhi ch'an kixin ti ixra kuènté Cristo kjuích'e ch'an. Mé xíkaha k'uúxin kjuaxikaon kixin chrók'uen ch'an kixin kjuínkĩtsana ch'an, kixin jahara la xitjahya chrókjuínkĩtsara kixin ikjin tjejora.

Ti nkehe chaxín sínki

3 ¹Ndá ijie, kíchóni, chrókócháhara kixin tinkáchónkira Ìnchéni. Janhan

la k'oxrjehya kjatee kjian kaín tíha éxi kuihínra senó, kixin tíha la jína chrókjuínkĩtsa ti jahara. ²Chrotsjehéra jína kixin síin chojni jínahña ixri éxi konia tsíkixikján, la tjinkaon sin chrókóchrít'o sin ntoara chrókuara xroye kuènté sin judío, kixin xíkaha chrókuaára, ichro sin. ³Kjánchó ti chojni chaxín chóna ti xroye kuènté Díos la jeheni tíha, kixin chaxín xraxinkaoni Díos kixin tjinkĩtsa ti Nchakuén ch'an, la ko imá chéheni kixin tinkáchónkini Ìnchéni Jesucristo. Méxra tjenkayáxinhñani kixin ti chrókuáni xroye kuènté sin judío ndá xíkaha chrókuaáxini. Náhí. ⁴Kjónté kjaxin janhan jína chróndáxrjan kixin ó nchoxon kaín tíhi, kixin janhan antsí k'uekuitekaosan tíhi. ⁵*Janhan mé tsíkinchekana sin xroye kuènté ti sin judío ti k'uéchonta ijní ñao, la janhan mé tsík'axrjeníxian ti sin israelita la tsík'axrjeníxian ti sin tsík'axrjeníxian Benjamín la ko kjaxin janhan mé tsík'axrjeníxian ti sin hebreo. La ko janhan mé k'uékjixin fariseona la k'uékinkachónkia ti ley kuènté sin judío éxi tinkáchónki ti sin fariseo. ⁶*La janhan chaxín imá k'uéninkakohan ti sin kuènté njnko la ko imá k'uékjintaxiteyáha ti ley, la

kohya ninkexró tsondáchro kixin chaxínhña tíha. ⁷Mé kaín tíha k'uékjít'a ósé kixin tsíndáxrjan kixin tjete sínkí tíha. Andá ijie t'íkuañ kixin ninkehó sínkíhya kaín tíha, kixin janhan la tinkachónkia Cristo. ⁸La kjaxin kaín ti nkehe k'uéchonta la t'íkuañ éxi chónkó tíha, kixin antsí tjetoan chróchoxian Ínchéni Jesucristo. La kaín ti nkehe k'uéchonta la kuitohá ndáha, la ijie tíha t'íkuañ éxi chjínínó ó kixin xíkaha jína chrókjuácha chróchoxian Cristo ⁹la ko nkoqoá chrókjuak'ekjan ch'an. La tjéyáhya kixin ti ley chrókótjuáxina. La náhí. Tjínkaon kixin Díos sinchetjóána kixin titekaon Cristo. ¹⁰Ti nkehe tjínkaon la tsochoxián Cristo la ko tsochonta ti kjuachaxin chóna ch'an ti xechón ch'an, la tjínkaon chrókjuasótéxína éxi kjuasótéxín ch'an la ko kjonté chrók'uenxian éxi k'uénxin ch'an ¹¹kixin xíkaha chrókjuácha chróchohan hasta chróxechána ínaá.

Pablo tjinkaon tsjacha ti nkehe jína tsjajon Díos

¹²Ndáxrjanhña kixin ó kjuácha kaín tíha, la ko ndáxrjanhña kixin ó ndoá itjén. Náhí. Janhan mé tjínkaon tsjácha sintaxiteyáha Cristo Jesús, ti nkexro kjuéyána senó. ¹³Jahara kíchóni, janhan naxa

ndáxrjanhña kixin ó kjuácha. La náhí. Ti nkehe tjínkaon mé chrók'uitjáñana kaín ti nkehe ó k'uat sínka. Andá ijie la tsotsjahá jína ti nkehe naxa t'itjáña tsjácha. ¹⁴Kixin xíkaha ndá chrókjuácha chrók'uayáha ti nkehe sinchekitoná Díos itjen nkaya nkajní. Díos mé k'uéyana kixin xíkaha ts'ayáha tíhi kixin tinkachónkia Jesucristo.

¹⁵Méxra kaín ti chojni chaxín tinkáchónki Jesús la xíkaha chrókjuénkayáxin sin. Andá ti nkojinra tjénkayáxinra ijnko nkehe, la Díos mé sinchexraxinkaon ti jahara kixin nduáhya tjejora. ¹⁶Méxra ticháxin chrókjuínchexiteyáni ti nkehe ó kjuachani k'uitjani.

¹⁷*Kíchóni, chrók'uejora éxi kjuak'é janhan, la ko kjaxin chrótsjehéra nkexrín tjejó ti íso chojni nchexiteyá éxi kjuákoxian. ¹⁸Nchónhña xrjanxaxián, la naxa tsokjatee tsoxrjanka, la imá tsjanka kixin itsjé chojni tjejó titekakohña sin la nínkakohen sin ti Cristo kjuák'enkáni ntacruz. ¹⁹Andá ti ó tsjixixín, la ti sin a mé ts'itjáña sin. Ti díos kuénté sin la mé ti nkehe chrókjonie sin la ko ti nkehe chrók'ui sin ó, la ko jehe sin mé nchenkexín sin ti nkehe chrókósuéxín sin. Jehó tjenkayáxin sin ti nkehe síin chjasintajni ó. ²⁰Andá jeheni la chóntani kjuachaxin

ts'ejóni nkaya nkajní la ko naxa tjejóchóheni kixin ts'inkajixin nkaya nkajní ti nkexro tsaáxini, mé Ìnchéni Jesucristo tíha.

²¹ Jehe ch'an mé tsjajon ch'an ijnko cuerpo nixin tsochóntani, tsoyóhe éxi ti cuerpo náxrjón chóntha ch'an. Andá ti cuerpo ntaxin náxrjónhña la tsitohe. Tíha mé tsohen kixin chóntha ch'an kjuachaxin ijíé ts'etuehen ch'an kaín nkehe.

Nkochríxín chrókócháhara kixin tinkachónkira Ìnchéni

4 ¹ Jahara kíchóni imá tjuahára, la ko imá tjínkaosan tsjasántsjahára kixin xikaha imá tsochéhe asená. Méxra jahara mé éxi ijnko nkehe jína ó kjuácha. Méxra kíchóni, jína chrók'uejora, chrókuinkachónkira Ìnchéni.

² Xrjanoáha jaha Evodia la ko jaha Síntique kixin nokoa chrókjuénkayáxian kixin éxi nokoa kichuara kixin tinkachónkira Ìnchéni. ³ Andá jaha kíchóni, mé jína k'uéjoni kjuích'eni ixra; méxra xrjanoáha kixin tsjinkítsa ti sin kíchóni ichjin, kixin kjaxin sin kjuínkítsa sin kjuích'e sin ixra ti ó níxja janhan ti itan jína tsaáxini. La ko ti kíchóni Clemente la ko íso sin kjuínkítsa kjuích'eni ixra. Ti ihníé sin la mé ó sínixín ti xroon chóntha ti ihníé chojni tsaá.

⁴ Chrókócháhara nkochríxín kixin tinkachónkira Ìnchéni, naxa xrjanká inaá kixin

chrókócháhara. ⁵ Mé xikaha kaín chojni chrókjuatsoan sin kixin jahara tjákoxinra jína. Kixin Ìnchéni la ó chjina itsi.

⁶ Méxra chrókókakuanhñara ninkehó. Ícha jína chróchenkara Díos kaín nkehe ticháxihanra, la ko chrókjuanchehéra ch'an, la kjaxin nkoyaxón chróchjehéra ch'an kjuasáya. ⁷ La jehe ch'an mé tsotjáhara ch'an ijnko kjuaxróxin imá ijíé, la nijnko chojni tsjachahya tienxín tíha. Ti kjuaxróxin mé ts'ayakohen asánra la ko ts'ayakohen ti kjuaxrexinkaon kuéntára kixin nokoa tinkachónkira Cristo Jesús.

Tíhi tjéncayáxinra

⁸ Méxra kíchóni, tíhi tétuahanra. Chrokjuénkayáxinra kaín ti nkehe chaxín, la kaín ti nkehe chonta kjuasáya, la kaín ti nkehe ndoá, kaín ti nkehe jína, la ti nkehe náxrjón la ko ti nkehe tóxríhin Díos.

⁹ Méxra chrók'uitjáñahñara kaín ti nkehe kjuákohára la ti nkehe kuihínra ti xrjanká la ti nkehe kuétuahanra la ko ti ixra k'uíkonra kjuít'a. Mé xikaha jína chrókjuákoxinra, andá ti Díos tjajon kjuaxróxin mé chrók'uejokora.

Ti chichaon kjuajon ti sin filipenses

¹⁰ Imá chàna kixin Ìnchéni kjuínkítsa ti jahara la ó xráxinkaonra inaá ti

janhan. Ndáxrjanhña kixin tsík'itjáñahanra ti janhan. Náhí. Jehí xrokuahya chrókuinkĩtsara ti janhan. ¹¹La ko ndáxrjanhña kixin nóaxin itjén la ko ticháxina nkehe, náhí. Janhan la ó kuàna itjén kjuaxróxin, kjónté ti nkehe chonta ó. ¹²Janhan la ó k'uífkonxian ti chontahya nkehe la ko kjaxin ti ó chonta nchónhña nkehe. Kjónté ichrén nkehe chrók'uatsínka la ó tsjácha, kjónté á kjonie jína o kjoniehña, á síin nkehe o kohya ninkehó. ¹³Kaín nkehe tjácha it'a kixin Cristo mé tsjinkĩtsana ti janhan. ¹⁴Méxra jahara jína kjuákoxinra kixin kjuinkĩtsara ti janhan la kjuájonra nkehe ticháxina.

¹⁵Jahara chojni chjasin Filipos, ó nohara jína kixin ti kjuankíxian kjuákua ti itan nixin tsjajon kjuachón ti sákuixián Macedonia, la jahóra ti ninko Filipos ichr'anra chichaon k'uayáha kixin cháhara kjuákohára itén Díos. ¹⁶*Méxra ti naxa kjuak'é Tesalónica, la jahara ichr'anra iso chichaon kuénté ninko iso vece kixin kjuinkĩtsara k'uíná ti nkehe kuék'ichánxina ntiha. ¹⁷La jehya kixin tjínkaon

kixin jehó chrók'uayáha nkehe. Náhí. Tjínkaon kixin antsí chrók'uánkí ti nkehe chróchontara nkaya nkajní ti itjen Díos. ¹⁸*Andá janhan ó k'uayáha kaín ti nkehe ichr'anra la antsí itsjé chonta. La ko kjaxin k'uayáha ti nkehe tsíchr'anra kjuikao Epafrodito, la ó tsjacha tíha. Tíhi la éxi ijnko nkehe xraxé náxrjón chróchjehéra Díos chrókóxríhín ch'an. ¹⁹La Díos kuéntana mé tsotjáhara kaín ti nkehe naxa ticháxinhara, kixin chóna ch'an kaín nkehe imá náxrjón tjete ts'áyéhe ti sin tinkáchónki Ìnchéni Cristo Jesús. ²⁰Mé It'éni Díos mé ts'áyéhe ch'an kjuasàya nkochrín. Mé xikaha tsohen.

Kjuixixín nixja Pablo

²¹Nixjehéra kaín ti sin tinkáchónki Jesucristo tjejó ntiha. Ti sin kíchóni tjejókoni ntihi mé nixjahára sin. ²²Kaín ti sin tjejó ntihi tinkáchónki Díos mé nixjahára sin, la ko kjaxin ti sin kíchóni ch'ehe ixra ti nkexro t'etoan romano mé xráxinkaon sin ti jahara. ²³Ìnchéni Jesucristo mé chrókjuintañaora kaínra. Ó tjen.